

# Penerang ke Bup Kereja Pengidup enggau Pengawa Kristian

1-7 JUN

RETA ARI BUP KUDUS | PEMUNGKAL 44-45

“**Josep Ngampun Bala Menyadi Iya**”

**(Pemungkal 44:1, 2)** Josep lalu bejaku enggau kepala ulun ke ngemataka rumah iya. Ku iya, “Isi guni sida enggau pemakai, naka ti ulih bai sida, lalu engkahka duit sida ba mua guni sida siku-siku.<sup>2</sup> Engkahka mangkuk pirak aku ba mua guni menyadi bunsu sida, sama enggau duit ti dikena iya meli gandum.” Ulun nya lalu ngereja nitihka asuh Josep.

w15 1/5 14-15

“**Kati Aku Tu Petara?**”

Josep nguji bala menyadi iya. Iya deka bala menyadi iya ditangkap sereta dituduh ngenchuri mangkuk. Lebuh mangkuk nya ditemu dalam guni Benjamin, semua sida dibai betemu baru enggau Josep. Josep bisa peluang ngelala sapa bala menyadi iya ke bendar. Judah nyadi pengari jaku sida. Iya minta kasih, indah madahka semua 11 iku sida sanggup nyadi ulun ba menua Ejip. Tang Josep madahka semina Benjamin aja ke patut nyadi ulun ba Ejip, lalu ke bukai enda tau enda ninggalka menua nya.—Pemungkal 44:2-17.

Lebuh Judah ninga utai ti dipadah Josep, iya lalu madahka: “Semina siku iya aja ti agi idup ari anak indai iya. Lalu apai iya balat rinduka iya.” Utai ti disebut nya tentu negu ati Josep, laban iya anak tuai ke diadaka Rachel, bini ti dikeh-sayauka Jakop. Rachel mati lebuh iya ngadaka Benjamin. Baka apai iya, Josep tentu ngenang mayuh utai ti manah pasal Rachel. Nya engka kebuah Josep balat rinduka Benjamin.—Pemungkal 35:18-20; 44:20.

Judah bebendar minta Josep ngambika enda ngasuh Benjamin nyadi ulun. Iya indah madahka diri ulih nyadi ulun kena nganti Benjamin. Ke pengujung iya, Judah madahka: “Baka ni ku aku tau pulai ngagai apai aku, enti nembiak tu enda

pulai sama enggau aku? Aku enda tan meda apai aku merinsa laban penusah tu.” (Pemungkal 44:18-34) Judah nunjukka diri udah berubah. Iya ukai aja nesal ati, tang mega ngayanka diri sinu, siru sereta enda berundingka diri empu.

Josep nyau enda ulih natka ati diri, lalu deka mansutka asai ati iya. Iya ngasuh semua ulun pansut ari bilik nya. Iya berengkah nyabak enggau inggar nyentukka sabak iya ulih didinga ari istana raja Ejip. Udah nya iya madah ngagai bala menyadi iya: “Aku tu Josep, menyadi kita.” Bala menyadi iya tekenyit. Iya merap sida lalu ngampunka semua utai ti udah dikereja sida ngagai iya. (Pemungkal 45:1-15) Josep neladan Jehovah ke seruran deka ngampun. (Masmur 86:5) Kati kitai pan baka nya?

**(Pemungkal 44:33, 34)** Nya alai, tuan, aku min-ta diri tinggal ditu nyadi ulun nuan, nganti nembiak tu. Awakka iya pulai enggau bala menya-di iya.<sup>34</sup> Baka ni ku aku tau pulai ngagai apai aku, enti nembiak tu enda pulai sama enggau aku? Aku enda tan meda apai aku merinsa laban penusah tu.

**(Pemungkal 45:4, 5)** Udah nya Josep lalu bejaku enggau sida, “Datai semak agi ngagai aku.” Sida mansang semak agi ngagai iya, lalu ku iya, ‘Aku tu Josep, menyadi kita ke dijual kita ngagai menua Ejip.<sup>5</sup> Anang tusah ati tauka ngutuk diri ketegal kita udah nyual aku kitu. Petara udah ngasuh aku datai ditu dulu ari kita ngambilka ngidupka nyawa orang mayuh.

**Ngulihka Penemu Bup Kudus ti Berega**

**(Pemungkal 44:13)** Bala sida menyadi lalu nyarikka gari diri, manggaika guni sida ba keledai sida, lalu nikal ngagai nengeri nya.

**it-2 813**

**Nyarikka Gari Diri**

Pengawa tu kesuah agi dikereja orang Judah enggau orang menua Timur kena nunjukka diri balat tusah ati. Tu kelebih agi digaga lebuh ninga

pasal kaban belayan ke udah mati. Pengawa tu semina nyarik begian gari kena ngayanka dada. Lalu tu ukai reti iya nyarik gari nyentukka gari nya enda ulih dikenaga agi.

Kali keterubah pengawa tu dipadah ba Bup Kudus, iya nya pasal Reuben, anak tuai Jakop. Iya pulai baru ngagai telaga laban deka ngiga Josep, tang Josep nadai agi dia. Ketegal nya, Reuben nyarik gari diri lalu madahka: "Nembiak nya nadai agi dia! Baka ni ku aku enggau nya?" Ketegal Reuben anak tuai, iya bisa tanggung pengawa nyaga menyadi iya ke biak. Lebuh Jakop ninga berita ke ngumbai Josep udah mati, iya nyarikka gari diri lalu ngerasukka kain guni kena nunjukka diri ngulit. (P-kal. 37:29, 30, 34) Lalu utai ti sama nyadi lebuh Benjamin dituduh nyadi penchuri ba menua Ejip. Bala menyadi tiri Josep nyarikka gari kena ngayanka diri tusah ati. —P-kal. 44:13.

**(Pemungkal 45:5-8)** Anang tusah ati tauka ngutuk diri ketegal kita udah nyual aku kitu. Petara udah ngasuh aku datai ditu dulu ari kita ngambika ngidupka nyawa orang mayuh. <sup>6</sup> Diatu lapar pungkang baru dua taun udah nyadi di menua tu. Lapar pungkang tu deka majak lima taun da agi. Dalam kandang maya nya, nadai orang ngeradu tanah umai, tauka ngetau. <sup>7</sup> Petara udah ngasuh aku datai ditu dulu ari kita, ngambika ngidupka nyawa kita ngena chara ti nyelai tu, kena nentuka kita enggau peturun kita idup. <sup>8</sup> Nya alai, iya ti bendar, ukai kita ke ngirumka aku kitu, tang Petara. Iya udah ngaga aku nyadi pemesai ti pemadu tinggi pangkat dalam perintah raja. Aku tu nyadi tuai ngemataka semua menua tu. Aku tu meh orang ke merintah semua menua Ejip.

w04 15/8 15 ¶15

Dipegedi Enggau Nadai Kebuah

<sup>15</sup> Nama ulih nulung kitai ngambika enda pedis ati lebuh orang begedika kitai enggau nadai kebuah? Kingatka meh, munsuh kitai ti lumur satu nya, Sitan enggau bala melikat iya ti jai. (Epesus 6:12) Sekeda orang sengaja merinsa kitai. Tang mayuh ari sida nyakal nembiak Petara laban

sida nadai penemu tauka disungkak orang bukai. (Daniel 6:4-16; 1 Timoti 1:12, 13) Jehovah deka "semua mensia diselamatka," lalu bisi peluang "nemu penemu pasal pemendar." (1 Timoti 2:4) Amat, sekeda ari sida ke kala ngelaban kitai, diaitu udah nyadi menyadi Kristian laban sida udah meda pengawa kitai ke nadai penyalah. (1 Peter 2:12) Nambahka nya, kitai ulih belajar ari teladan Josep, anak Jakop. Taja pan Josep balat merinsa ketegal bala menyadi tiri iya, iya enda bedendam enggau sida. Nama kebuah? Laban iya ulih beratika tulung ari Jehovah senentang tu, ke benung merambu pelan kena ngamatka tuju iya. (Pemungkal 45:4-8) Pia mega, Jehovah ulih ngasuh utai ti enda lurus ke ditapi kitai mai mulia ngagai nama iya.—1 Peter 4:16.

## 8-14 JUN

### RETA ARI BUP KUDUS | PEMUNGKAL 46-47

#### "Pemakai Lebuh Bisi Lapar Pungkang"

**(Pemungkal 47:13)** Lapar pungkang balat amat nyadi, datai ke pemakai nyau abis di semua endur, lalu orang di menua Kanaan enggau di menua Ejip nyau lepi laban lapar pungkang nya.

w87 1/5 15 ¶2

Terus Idup Taja Pan Bisi Lapar Pungkang

<sup>2</sup> Timpuh tujuh taun alai orang bulih utai udah abis. Lalu, baka ke dipadah Jehovah, lapar pungkang berengkah "ngelekai ngagai semua menua nya." Lebuh sida ke lapar ari menua Ejip minta pemakai ari raja, raja Ejip "ngasuh sida mansang ngagai Josep, sereta ngasuh sida ngereja utai ti diasuh Josep." Josep nyual gandum ngagai orang Ejip nyentukka semua duit sida abis. Pengudah nya, orang Ejip mayar ngena jelu tupi. Ke pengujung iya, sida datai ngagai Josep lalu madah: "Beli kami enggau tanah kami kena nyilih pemakai. Kami deka nyadi ulun raja, lalu iya deka bempu tanah kami." Nya alai, Josep meli semua tanah orang Ejip ke raja.—Pemungkal 41: 53-57; 47:13-20.

**(Pemungkal 47:16)** Disaut Josep, "Bai jelu tupi

kita kitu. Aku deka meri kita pemakai kena nyilih jelu tupi kita, enti duit kita udah abis.”

**(Pemungkal 47:19, 20)** Anang nejuka kami mati. Kereja sebarang utai kena ngidupka kami. Anang nejuka tanah kami puang. Beli kami enggau tanah kami kena nyilih pemakai. Kami deka nyadi ulun raja, lalu iya deka bempu tanah kami. Beri kami gandum ke pemakai kami, enggau ke benih kami, ngambika kami ulih nanam utai ba tanah kami.”<sup>20</sup> Josep lalu meli semua tanah di menua Ejip. Semua orang Ejip nyual tanah sida, laban lapar pungkang balat amat nyadi; lalu semua menua nya udah nyadi pesaka raja magang.

**(Pemungkal 47:23-25)** Ku Josep bejaku enggau orang mayuh, “Aku diatu udah meli kita enggau tanah kita, ke raja. Tu benih ti tau ditanam kita ba tanah kita.<sup>24</sup> Lebuh maya ngetau, kita enda tau enda meri dua puluh peratus ngagai raja. Kita tau ngena teda utai nya nyadika benih, enggau ke pemakai kita.”<sup>25</sup> Ku sida nyaut, “Nuan udah ngidupka nyawa kami. Nuan udah manah enggau kami, tuan, lalu kami deka nyadi ulun raja.”

**kr 234-235 ¶11-12**

### Perintah Petara Ngereja Peneka Petara ba Dunya

<sup>11</sup> **Pemayuh.** Dunya tu balat merinsa laban nadai utai kena negapka pengarap. Bup Kudus nangkan: ‘Maya deka datai alai Aku deka ngasuh lapar pungkang nyadi di menua tu. Mensia deka lapar, tang ukai lapar ke pemakai. Sida deka aus, tang ukai aus ke ai. Sida deka lapar enggau aus ke pesan Jehovah. Aku Jehovah ti Pemadu Tinggi, udah bejaku.’ (Amo. 8:11) Katu nembiaik Perintah Petara merinsa ketegal lapar pungkang? Jehovah madahka bida entara nembiaik enggau munsuh iya: “Orang ke nyembah sereta ngasika Aku deka mayuh utai diempa enggau utai diirup, tang kita deka lapar sereta aus. Sida deka diau lantang, tang kita deka dipechat.” (Isa. 65:13) Katu nuan udah meda ayat tu dikeamatka?

<sup>12</sup> Kitai nerima mayuh utai ti ulih negapka pengarap kitai. Utai ke diterima nya baka sungai ti

majak besai sereta majak dalam. Dunya tu merinsa laban nadai utai kena negapka pengarap. Tang gerempung kitai udah nyediaka mayuh litaricha ke bepelasarka Bup Kudus, audio enggau video ti dirikut, gempuru, konvensyen, sereta pererang ke bisi ba laman Web kitai. (Esk. 47:1-12; Jol. 3:18) Endaka nuan alit ati meda Jehovah ngamatka semaya iya ke deka nyediaka semua utai kena negapka pengarap nuan ninting hari? Katu nuan seruran belajar ari utai ti disediaka Jehovah?

### Ngulihka Penemu Bup Kudus ti Berega

**(Pemungkal 46:26, 27)** Penyampau peturun Jakop ari tubuh iya empu ke pindah ngagai menua Ejip nya enam puluh enam iku, enda ngitung bini bala anak iya.<sup>27</sup> Pemayuh sida Jakop sebilik di menua Ejip nya tujuh puluh iku, nyengkaum anak Josep dua iku ke diadaka di menua nya.

**nota pelajar ke SKR. 7:14, nwtsty**

**75 iku sida sebilik:** Stephen engka enda nandu enggau nyemetak ayat ari Sempekat Lama lebuh iya madahka penyampau ruang bilik Jakop ba Ejip nya 75 iku. Penyampau tu nadai ba teks Masoret Sempekat Lama. P-kal. 46:26, 27 madahka: “Penyampau peturun Jakop ari tubuh iya empu ke pindah ngagai menua Ejip nya enam puluh enam iku, enda ngitung bini bala anak iya. Pemayuh sida Jakop sebilik di menua Ejip nya tujuh puluh iku, nyengkaum anak Josep dua iku ke diadaka di menua nya.” Ari ayat tu, kitai ulih meda bisi dua iti chara kena ngitung penyampau orang. Penyampau keterubah nya peturun ari iya empu ke sama enggau iya tama ngagai menua Ejip, lalu penyampau kedua nya nyengkaum semua sida ke diau enggau iya ba menua Ejip. Penyampau peturun Jakop bisi dipadah ba P-sut. 1:5 enggau U-dat. 10:22. Ayat nya nunjukka penyampau nya 70 iku orang. Stephen engka meri penyampau ti bukai ke nyengkaum kaban belyan Jakop. Sekeda orang madahka, nya engka nyengkaum anak enggau uchu Manasi enggau Epraim ke bisi disalin ba Septuagint

pasal P-kal. 46:20. Sekeda ke bukai madahka, nya engka nyengkaum bini anak Jakop ke bukai. Lalu sida enda disengkaum ba penyampau ke ditulis ba P-kal. 46:26. Nya alai, "75" iku ke ditulis nya engka semua sekali. Penyampau tu engka dikenra ba salin Sempekat Lama ke disadung ba abad keterubah S.M. Pengelama betaun-taun, pakar Bup Kudus nemu penyampau "75" iku nya penyampau ke diberi ba P-kal. 46:27 enggau P-sut. 1:5 ba salin *Septuagint* Grika. Pia mega, ba abad ke-20, dua iti begin ari Gulung Surat Tasik Mati ke bekaul enggau P-sut. 1:5 udah ditemu. Lalu dia mega bisa ditulis penyampau "75" iku. Penyampau ke ditulis Stephen engka bepelasarka siti ari teks kelia tu. Enda ngira ni siti penemu ke betul, penyampau ke ditulis Stephen semina mandangka chara bukai kena ngitung peturun Jakop.

**(Pemungkal 46:33, 34)** Lebuh raja mesanka kita, lalu nanya pengawa ti dikereja kita,<sup>34</sup> kita enda tau enda madahka diri endang orang ke nginang jelu tupi seumur idup, baka aki ini kita kelia. Nya baru iya deka ngasuh kita diau di menua Gosen." Josep nyebut nya laban orang Ejip keji begulai enggau orang ke pengibun bedus.

## it-2 109 ¶7

### Apai Josep Datai Ngagai Ejip

Pengudah Judah madahka ngagai Josep pasal apai iya Jakop ke deka datai, Josep pan nyediaka kerita perang iya lalu mansang betemu enggau Jakop ba Gosen. Udah nya, Josep enggau lima iku menyadi iya betemu enggau raja Ejip. Baka ke diasuh Josep, bala menyadi iya madahka diri nyadi pengibun bedus lalu minta diri diau nyadi orang kampar ba menua Gosen. Raja besetuju enggau utai ti dipinta sida. Lalu pengudah Josep mai apai iya betemu enggau raja, iya ngentapka apai iya enggau bala menyadi iya diau di begin ti pemedu manah ba menua nya. (P-kal. 46:28-47:11) Josep enggau landik sereta pintar ngena runding orang Ejip ti keji enggau bala pengibun bedus. Ketegal nya, ruang bilik Jakop dijaga ari ulah orang Ejip. Tu mega nyeliahka sida ari sebarang tikah enggau orang

Ejip ke ulih ngachau peturun sida. Kenyau ari nya Jakop enggau ruang bilik iya bepongai ba Josep. (P-kal. 47:12) Ari semua utai ti nyadi, sida nya baka nunduk ngagai Josep ke nyadi lumur dua raja ba menua Ejip. Lalu tu ngamatka genera ba mimpi Josep enggau chara ti ngalitka ati.

## 15-21 JUN

### RETA ARI BUP KUDUS | PEMUNGKAL 48-50

#### "Bisi Mayuh Utai ke Ulih Dipelajarka ari Orang ke Tuai"

**(Pemungkal 48:21, 22)** Lalu ku Jakop bejaku enggau Josep, 'Nuan nemu, aku nyau deka mati, tang Petara deka meruan enggau nuan, lalu deka mai nuan pulai ngagai menua aki ini nuan.<sup>22</sup> Aku meri Sekem ngagai nuan, ukai ngagai bala menyadi nuan. Menua nya ami, lalu udah dirampas aku ari orang Amor ngena pedang enggau panah aku.'

#### it-1 1246 ¶8

##### Jakop

Sebedau Jakop mati, iya merekatka bala uchu lelaki iya, anak Josep. Lalu ketegal iring ari Petara, iya meri berekat ti besai agi ngagai Epraim ti biak agi ari Manasi. Udah nya, Jakop madahka tu ngagai Josep ke deka nerima dua kali lipat reta pesaka: "Aku meri Sekem ngagai nuan, ukai ngagai bala menyadi nuan. Menua nya ami, lalu udah dirampas aku ari orang Amor ngena pedang enggau panah aku." (P-kal. 48:1-22; 1 Ban. 5:1) Ketegal Jakop udah meli padang ti semak enggau Sekem ari peturun Hamor (P-kal. 33:19, 20), semaya ke digaga ngagai Josep nya nunjukka iya andalka Josep. Semaya nya pasal menua Kanaan ke deka ditaban bala peturun iya. Chara Jakop madahka semaya nya baka ke udah dikeamatka enggau pedang sereta panah iya empu. (Peda ORANG AMOR.) Reta pesaka dua kali lipat ke diterima Josep nya nyengkaum dua begin ke diberi ngagai raban bansa Epraim enggau Manasi.

**(Pemungkal 49:1)** Jakop mesanka bala anak iya, lalu bejaku, "Begempuru ngelingi aku laban aku

deka madahka ngagai kita utai ti deka nyadi ba kita jemah ila.

## it-2 206 ¶1

### Hari ti Penudi

**Jaku Benabi ke Dipadah Jakop Sebedau Iya Mati.** Lebuh Jakop bejaku enggau bala anak iya, “Begempuru ngelingi aku laban aku deka madahka ngagai kita utai ti deka nyadi ba kita jemah ila,” reti iya utai tu deka dikeamatka jemah ila. (P-kal. 49:1) Lebih ari dua abad sebedau nya, Jehovah udah madah ngagai aki Jakop, Abram (Abraham), pasal peturun iya ke deka diperinsa pengelama 400 taun. (P-kal. 15:13) Nya alai senentang tu, timpuh “jemah ila” ke dipadah Jakop semina ulih berengkah pengudah timpuh perinsa 400 taun nya udah abis. (Kena nemu mayuh agi pasal Pemungkal 49, peda artikel pasal anak Jakop nitihka turut nama sida empu.) Kitai mega ulih ngarapka jaku benabi tu deka dikeamatka ila bekaul enggau ‘orang Israel ke nembiaik Petara.’ —Gal. 6:16; Rom. 9:6.

**(Pemungkal 50:24, 25)** Ku iya bejaku enggau bala menyadi iya, ‘Aku diatu nyau deka mati, tang Petara tetap deka ngemataka kita, lalu mai kita pansut ari menua tu ngagai menua ti udah disemaya lya ngena sumpah ngagai Abraham, Isak enggau Jakop.’<sup>25</sup> Udah nya Josep lalu ngasuh bala iya besumpah. Ku iya, ‘Kita enda tau enda besemaya deka mai bangkai aku enggau kita, lebuh Petara nguluka kita ngagai menua nya.’

## w07 6/1 28 ¶10

### Bala Menyadi ke Tuai—Berekat ngagai Sida ke Biak

<sup>10</sup> Bala menyadi ke tuai mega ulih nyadi chunto ti manah ngagai sida ti biak ke sama pengrap. Anak Jakop, Josep, ngereja siti pengawa mit ke meri empas ti besai ngagai bejuta iku bala penyembah ti bendar ke idup pengudah iya. Iya ngereja tu lebuh iya udah tuai. Iya beumur 110 taun lebuh iya “meri atur pasal chara sida patut nguburka iya,” ngambika sida mai tulang iya enggau sida lebuh sida ninggalka Ejip. (Hebrew 11:22; Pemungkal 50:25) Orang Israel

betaun-taun nyadi ulun pengudah Josep mati. Lalu pesan ke dipadah Josep tadi mai pengadang ngagai sida laban sida ulih andalka diri deka dilepaska.

### Ngulihka Penemu Bup Kudus ti Berega

**(Pemungkal 49:19)** “Gat deka diserang bala perumpak, Tang iya deka mutar, lalu begagaika sida.

## w04 1/6 15 ¶4-5

### Beberekat Meh Sida ke Meri Mulia Ngagai Petara

<sup>4</sup> Sebedau tama ngagai Menua ti Udah Disemaya, orang Israel ari raban bansa Gat minta ngambika sida ulih dikemendarka diau ba alai sepiak timur sungai Jordan. Tanah nya ami sereta manah alai betupika jelu. (Penyampau 32: 1-5) Pengidup dia deka napi mayuh penanggul. Lebak Jordan ngelindung raban bansa ke diau tunga ke barat ari serang bala soldadu. (Josua 3:13-17) Taja pia, bekaul enggau tanah tunga ke timur Jordan, bup *The Historical Geography of the Holy Land*, ke ditulis George Adam Smith, madahka: “Nengeri nya rata, luas sereta nadai utai ke mempang ba emperan Arab. Ketegal nya, sida berasai irau laban orang jai ke mansa dia ulih nyerang sida. Kadang-kadang, sida ulih diserang nyauka ninting taun lalu menua sida ke betupika jelu dirampas.”

<sup>5</sup> Baka ni raban bansa Gat deka mutarka penanggul ti enda nemu abis tu? Beratus taun suba, Jakop madahka tu sebedau iya mati: “Gat deka diserang bala perumpak, Tang iya deka mutar, lalu begagaika sida.” (Pemungkal 49:19) Terubah iya, kitai engka ngumbai jaku nya ngemelika. Tang kebendar iya, jaku nya ngundan pesan ke ngasuh orang Gat malas serang sida. Jakop ngasuh sida andal, enti sida ngereja nya, bala perumpak nya deka rari. Lalu orang Gat deka begagaika sida.

**(Pemungkal 49:27)** “Benjamin nya baka ukui kampung ti mangah. Pag ilemai iya munuh lalu makai.”

**it-1 289 ¶2**

## **Benjamin**

Pengelandik peturun Benjamin belaban bisi disebut ba jaku benabi ke dipadah Jakop sebedau iya mati. Ku iya madahka: “Benjamin nya baka ukui kampung ti mangah. Pagi lemai iya munuh lalu makai.” (P-kal. 49:27) Peturun Benjamin ke landik beperang tebilang ketegal sida landik ngena pangwang; sida ulih nimbakka batu ngena jari kanan tauka ngena jari kiba lalu ulih nyelinting “lambar buk” ngena pangwang sida. (P-ulu. 20:16; 1 Ban. 12:2) Hakim Ehut ke bejari chawit ari raban bansa Benjamin munuh Raja Eglon. (P-ulu. 3:15-21) Bup Kudus mega madahka, maya “pagi” nya pun sejarah perintah Israel. Lalu, “raban bansa ti pemedu mit,” Benjamin, ngasilka raja Israel ti keterubah, iya nya, Saul anak Kis. Iya amat berani ngelaban orang Pilistin. (1 Sam. 9:15-17, 21) Pia mega, maya “lemai” nya lebuh nadai agi raja ba Israel enggau Judah ke dipegai Perintah Persia. Lalu, raban bansa Benjamin ngasilka Kuin Ester enggau Perdana Menteri Mordikai. Lalu seduai iya nyelamatka orang Israel ari dirusakka Perintah Persia.—Est. 2:5-7.

## **22-28 JUN**

### **RETA ARI BUP KUDUS | PEMANSUT 1-3**

#### **“Aku Deka Nyadi Sebarang Utai Aku Deka”**

**(Pemansut 3:13)** Tang ku Moses nyaut, “Lebuh aku betemu enggau orang Israel, lalu nyebut ngagai sida, ‘Petara aki ini kita udah ngasuh aku betemu enggau kita,’ sida deka nanya ngagai aku, ‘Sapa nama iya?’ Nama utai ti patut dipadahka aku ngagai sida?”

**w13 15/3 25 ¶4**

#### **Ngemuliaka Nama Jehovah ti Pemedu Besai**

**<sup>4</sup> Bacha Pemansut 3:10-15.** Lebuh Moses beumur 80 taun, Petara meri iya siti pesan ti besai: “Nuan mai nembiak Aku pansut ari menua Ejip.” Enggau bebas Moses nanya: ‘Sapa nama Nuan?’ Moses endang udah nemu nama Petara. Nyadi, nama kebuah iya nanya utai nya?

Kebendar iya, Moses deka nemu agi pasal *Petara ke ngena nama nya*. Iya deka ngasuh orang Israel andalka Petara deka nyelamatka sida. Orang Israel udah lama nyadi ulun. Nya alai, sida engka kakang ati sekalika kuasa Jehovah ulih ngelepaska sida. Indah sekeda orang Israel udah berengkah nyembah petara orang Ejip!—Esk. 20: 7, 8.

**(Pemansut 3:14)** Ku Petara nyaut Moses, “AKU TU MEH AKU. Nuan enda tau enda madahka ngagai orang Israel: ‘Iya ke dikumbai AKU TU MEH AKU udah ngirumka aku ngagai kita.’

**wp19.01 5 ¶1**

#### **Sapa Nama Petara**

**Nama nya nerangka sapa Petara.** Mayuh pakar Bup Kudus madahka, reti nama Jehovah nya “Iya ti Ngasuh Nyadi.” Petara Jehovah madahka reti nama iya lebuh bejaku ngagai Moses: “Aku Deka Nyadi Sebarang Utai Aku Deka.” (Pemansut 3:14, nota kaki) Nya alai, nama Petara ukai semina nunjukka iya nya Penempa semua utai. Nama iya nunjukka, iya ulih *ngasuh Diri Empu enggau utai ti ditempa iya nyadi sebarang utai ti dikekdeka ka iya kena ngamatka tuju iya*. Taja pan gelar ulih nunjukka penuduk, hak, tauka kuasa Petara, tang nama iya, Jehovah, ngambarka sapa iya ke bendar sereta utai ke ulih digaga iya.

#### **Ngulihka Penemu Bup Kudus ti Berega**

**(Pemansut 2:10)** Udah bekau nya, lebuh anak mit nya nyau besai, indu nya mai iya ngagai anak indu raja. Anak indu raja nya lalu ngiru nembiak nya nyadika anak iya empu. Ku anak indu raja nya berunding dalam ati diri, “Aku ngambi iya ari ai, nya alai aku meri iya nama Moses.”

**g04 8/4 6 ¶5**

#### **Moses—Nyata tauka Cherita Ngapa?**

Kati nya tusah deka pechaya pasal anak indu raja Ejip ke deka ngiru anak ke baka nya? Enda, laban pengarap orang Ejip ngajar, enti sida deka niki ke serega, sida patut ngereja utai ti manah. Bekaul enggau pengawa ngiru nya, seiku arkeologi ke benama Joyce Tyldesley madahka: “Orang

indu Ejip setara enggau orang lelaki Ejip. Sida nerima hak ti sama senentang undang-undang enggau ekonomi. Abis enda pan nitihka teori, . . . orang indu ulih ngiru anak.” Papairus kelia pasal pengawa ngiru bisi madahka pasal seiku indu Ejip ke ngiru bala ulun iya. Bekaul enggau indai Moses ke diupah nyadi indu ke nusuka anak, *The Anchor Bible Dictionary* madahka: “Pengawa ngupah indai ada Moses kena nusuka iya . . . nyauka sebaka enggau atur pengawa ngiru orang ba Mesopotamia.”

**(Pemansut 3:1)** Nyadi sekali, lebuh Moses benung ngibun bedus enggau kambin mentua iya Jetro, ti nyadi imam orang Midian, iya nguluka raban jelu nya bejalai meraka menua puang, lalu datai di Sinai, iya nya bukit ti kudus.

w04 15/3 24 ¶4

#### Penerang ari Bup Pemansut

**3:1—Jetro nya imam ke baka ni?** Maya jeman Abraham, Isak enggau Jakop, sida ke nyadi tuai bilik mega nyadi imam ke ruang bilik. Jetro nya tuai bilik ke raban bansa Midian. Ketegal orang Midian nya peturun Abraham nengah Keturah, sida engka nemu pasal sembah ngagai Jehovah. —Pemungkal 25:1, 2.

## 29 JUN-5 JULAI

### RETA ARI BUP KUDUS | PEMANSUT 4-5

#### “Aku Deka Nulung Nuan Bejaku”

**(Pemansut 4:10)** Tang ku Moses, ‘Enggai aku, Jehovah. Anang ngasuh aku. Aku enda lanchar bejaku, lalu aku apin nyadi orang ke lanchar bejaku sekumbang Nuan ti udah bejaku ngagai aku. Aku enda lanchar bejaku, lubah sereta kat-kat.’

**(Pemansut 4:13)** Tang ku Moses nyaut, ‘Enggai aku, Jehovah. Asuh orang bukai.’

w10 15/10 13-14

#### Giga Tegal—Nama Runding Jehovah Pasal Nya?

“**Aku enda chukup landik.**” Nuan engka ngasaika diri enda layak nyadi penginjil. Sekeda nembiaik

Jehovah ke tetap ati maya jeman Bup Kudus ngasaika diri enda chukup landik bejalaika pengawa ke diberi Jehovah ngagai sida. Peratika chunto Moses. Lebuh iya nerima pengawa ti nyemetak ari Jehovah, ku iya madah: ‘Enggai aku, Jehovah. Anang ngasuh aku. Aku enda lanchar bejaku, lalu aku apin nyadi orang ke lanchar bejaku sekumbang Nuan ti udah bejaku ngagai aku. Aku enda lanchar bejaku, lubah sereta kat-kat.’ Taja pan Jehovah udah ngasuh iya andal, tang ku Moses nyaut agi: ‘Enggai aku, Jehovah. Asuh orang bukai.’ (P-sut. 4:10-13) Nama runding Jehovah pasal nya?

**(Pemansut 4:11, 12)** Ku Jehovah bejaku ngagai iya, ‘Sapa meri mensia mulut? Sapa ngasuh iya bengal tauka bisu? Sapa ngasuh iya ulih meda, tauka buta? Aku ti Jehovah. <sup>12</sup> Nya alai, mupuk nuan! Aku deka nulung nuan bejaku, lalu Aku deka madahka utai ti patut disebut nuan.’

w14 15/4 9 ¶5-6

#### Kati Nuan Meda ‘Petara ti Enda Ulih Dipeda’?

<sup>5</sup> Sebedau Moses pulai baru ngagai menua Ejip, Petara ngajar iya siti utai ti beguna. Lalu utai ti sama ditulis Moses ba bup Jop: ‘Enti kita deka bepenemu-dalam, kita enda tau enda nangika Jehovah.’ (Jop 28:28) Kena nulung Moses bulih ati ti nangika Petara sereta ngereja utai enggau betul, Jehovah madahka bida entara iya enggau mensia. Ku Jehovah: ‘Sapa meri mensia mulut? Sapa ngasuh iya bengal tauka bisu? Sapa ngasuh iya ulih meda, tauka buta? Aku ti Jehovah.’ —P-sut. 4:11.

<sup>6</sup> Nama utai ti ulih dipelajar? Moses tau enda ibuh takut laban iya dianjung Jehovah. Jehovah tentu meri Moses utai ti diguna iya kena ngenataika pesan ngagai raja Ejip. Pia mega, Jehovah bekuasa agi ari raja Ejip. Nambahka nya, tu ukai keterubah iya nembiaik Petara napi penanggul ari orang Ejip. Moses engka belematika chara Jehovah nyaga Abraham, Josep sereta iya empu maya sida dipegai raja Ejip ke bukai. (P-kal. 12:17-19; 41:14, 39-41; P-sut. 1:22-2:10) Ketegal arapka Jehovah, ‘Petara ti enda ulih dipeda,’

Moses berani betemu enggau raja Ejip lalu madahka semua pesan Jehovah.

**(Pemansut 4:14, 15)** Jehovah lalu ringat ngagai Moses. Ku iya, "Kati ku baka menyadi nuan, Aron, ke ari peturun Lewi? Aku nemu iya lanchar bejaku. Iya diatu baru deka datai betemu enggau nuan, lalu iya deka gaga ati lebuh iya meda nuan. <sup>15</sup> Nuan tau bejaku enggau iya, lalu madahka ngagai iya utai ti disebut Aku. Aku deka nyaup seduai bejaku, lalu Aku deka madahka utai ti patut dikereja seduai.

w10 15/10 14

### Giga Tegal—Nama Runding Jehovah Pasal Nya?

Jehovah tetap deka Moses bejalaika pengawa ke diberi ngagai iya. Taja pia, Jehovah ngasuh Aron nulung Moses bejalaika pengawa iya. (P-sut. 4: 14-17) Beberapa taun udah nya, Jehovah bisa enggau Moses, lalu nyediaka sebarang utai ti diguna iya kena ngemujurka semua pengawa ke udah diberi Jehovah ngagai iya. Kemayaharitu, kitai mega ulih arapka Jehovah deka meransang bala menyadi ke bepeneleba nulung kitai bejalaika pengawa nginjil. Kelebih agi, Jaku Petara madahka, Jehovah deka ngasuh kitai layak nge-reja semua utai ke diasuh iya.—2 Kor. 3:5; peda kutak "Tahun-tahun yang Paling Membahagian" dalam jaku Indonesia.

### Ngulihka Penemu Bup Kudus ti Berega

**(Pemansut 4:16)** Iya deka bejaku ngagai orang mayuh ngarika nuan. Nya baru nuan deka nyadi baka Petara, madahka ngagai Aron utai ti patut disebut iya.

w04 15/3 24 ¶6

### Penerang ari Bup Pemansut

4:16—Baka ni Moses 'deka nyadi baka Petara'

**ngagai Aron?** Moses nya pengari Petara. Nya alai, Moses nyadi 'baka Petara' ngagai Aron, ke bejaku ngarika Moses.

**(Pemansut 5:2)** Raja nya lalu nanya, 'Sapa ke dikumbai Jehovah? Lalu nama kebuah aku enda tau enda mendingka iya lalu ngelepaska orang Israel? Aku enda nemu Jehovah, lalu aku enggai ngelepaska orang Israel.'

it-2 12 ¶5

### Jehovah

"Nemu" enda seruran mai reti ngelala pasal siti-siti utai tauka pasal seseiku orang. Nabal ke beli nemu nama David tang iya agi nanya, "Sapa David?", tauka dalam jaku bukai, "Nama penuduk iya?" (1 Sam. 25:9-11; banding 2 Sam. 8:13.) Pia mega raja Ejip kala madah ngagai Moses: 'Sapa ke dikumbai Jehovah? Lalu nama kebuah aku enda tau enda mendingka iya lalu ngelepaska orang Israel? Aku enda nemu Jehovah, lalu aku enggai ngelepaska orang Israel.' (P-sut. 5: 1, 2) Enggau nya, Raja Ejip madahka diri enda ngelala Petara, sereta enda ngumbai Jehovah nya Petara ti bendar. Lalu, Jehovah nya baka ke nadai kuasa ba raja Ejip sereta pengawa ti dikereja iya. Lalu, Jehovah mega baka ke nadai kuasa kena ngasuh peneka iya nyadi baka ke dipadah Moses enggau Aron. Tang diatu raja Ejip enggau semua orang Ejip, nyengkaum orang Israel deka nemu reti ke bendar nama Petara. Baka ke ditunjukka Jehovah ngagai Moses, sida deka nemu reti nama iya lebuh sida meda utai ke digaga Jehovah ngagai orang Israel. Iya deka ngelepaska sida sereta meri sida Menua ti Udah Disemaya. Enggau nya, sempekat iya enggau bala aki ini sida deka dikeamatka. Enggau chara tu, baka ke dipadah Jehovah, 'Kita deka nemu Aku endang Jehovah Petara kita.'—P-sut. 6:4-8; peda TI PEMADU BEKUASA.